



Sud Bosne i Hercegovine  
Суд Босна и Херцеговина

---

Predmet broj: S1 2 K 022112 16 Ko

Datum: objavljivanja 16.08.2016. godine  
pismenog otpravka 19.08.2016. godine

---

Sudija za prethodno saslušanje: Branko Perić

**PREDMET TUŽILAŠTVA BOSNE I HERCEGOVINE**  
protiv  
Almira Džinića

---

**PRESUDA**

---

**Tužilac Tužilaštva Bosne i Hercegovine:**

Ljubo Badnjar

**Branilac optuženog:**

Advokat Mehmed Ceribašić

**Zapisničar:**

Amela Huseinbegović, stručni saradnik

**Broj: S1 2 K 022112 16 Ko**  
**Sarajevo, 16.08.2016. godine**

## **U IME BOSNE I HERCEGOVINE**

Sud Bosne i Hercegovine, sudija Branko Perić, kao sudija za prethodno saslušanje, uz sudjelovanje stručnog saradnika Amele Huseinbegović, u svojstvu zapisničara, u krivičnom predmetu protiv optuženog Almira Džinića, zbog krivičnog djela Organiziranje terorističke grupe iz člana 202d. stav 2., u vezi sa stavom 1. Krivičnog zakona Bosne i Hercegovine (KZ BiH), povodom optužnice Tužilaštva BiH broj: T20 0 KTT 0011941 16 od 10.08.2016. godine, a potvrđena dana 11.08.2016., nakon održanog pretresa za razmatranje .sporazuma o priznanju krivice i ročišta za izricanje krivičnopravne sankcije, u prisustvu tužilaca Tužilaštva BiH Ljube Badnjaka i Dubravka Čampare, optuženog Almira Džinića, lično i njegovog branioca, advokata Mehmeda Ceribašića, dana 16.08.2016. godine, donio je i javno objavio:

### **P R E S U D U**

#### **Optuženi:**

**ALMIR DŽINIĆ**, sin Amira i majke Emire, rođen 02.12.1997. godine u Tešnju, nastanjen u ulici Logobare bb, općina Tešanj, po nacionalnosti Bošnjak, državljanin BiH, JMBG: 0212997124127, sa završenom osnovnom školom, neoženjen, lošeg imovnog stanja, lišten slobode dana 23.07.2016. godine u 20,45 sati, nalazi se u pritvoru po Rješenju Suda BiH broj: S1 2 K 022112 16 Krn od 24.07.2016. godine, ranije neosuđivan,

### **K R I V J E**

#### **Što je:**

Dana 13.12.2013. godine sa Međunarodnog aerodroma Sarajevo, zajedno sa svojom porodicom otputovao prvobitno do Republike Turske do grada Istanbul, a zatim dalje otputovao na područje Sirije, u namjeri da se priključi terorističkoj organizaciji Islamske države Iraka i Levanta (ISIL) koja djeluje na području Sirije i Iraka, a koje su na osnovu rezolucije R-1267 iz 1999. godine, dana 30.05.2013. godine od strane Vijeća sigurnosti Ujedinjenih nacija pograšene i listirane kao teroristička grupa i organizacija, koje imaju za cilj destabilizaciju i nasilnu izmjenu političkog i ustavnog poretka u Siriji, čiji pripadnici svakodnevnim oružanim akcijama, i to napadima na stanovništvo, ubijanjima, protupravnim zatvaranjima, uzimanjem talaca i drugim radnjama namjeravaju da prisile legitimne vlasti Sirije na izmjenu ustavnog poretka i režima, pa se tako krajem decembra 2015. godine pridružio vojnim formacijama ISIL-a gdje je kao pripadnik terorističke grupe ISIL u oružanim sukobima učestvovao u borbama protiv zvaničnog režima na području Sirije i to sve do jula 2016. godine, kada je napustio područje Sirije,

**čime je** počinio krivično djelo Organiziranje terorističke grupe iz člana 202.d stav 2., u vezi sa stavom 1. KZ BiH,

pa mu Sud, na osnovu članova 39., 42., 48., 49. i 50. stav 1. tačka b) KZ BiH, izriče:

### **KAZNU ZATVORA U TRAJANJU OD 1 (JEDNE) GODINE**

Na osnovu člana 56. KZ BiH, optuženom se u izrečenu kaznu ima uračunati vrijeme provedeno u pritvoru po Rješenju Suda BiH broj: S1 2 K 022112 16 Krn od 24.07.2016. godine, i to počev od dana lišenja slobode, tj. od 23.07.2016. godine, a produžen Rješenjem Suda BiH broj: S1 2 K 022112 16 Ko od 16.08.2016. godine, koji pritvor može trajati najduže 9 (devet) mjeseci, odnosno do upućivanja na izdržavanje kazne zatvora ili do nove odluke Suda.

Na osnovu člana 188. stav 4. ZKP BiH, optuženi se oslobađa naknade troškova krivičnog postupka.

## **O b r a z l o ž e n j e**

### **1. Optužba**

Tužilaštvo BiH je optužnicom broj: T20 0 KTT 0011941 16 od 10.08.2016. godine, optužilo Almira Džinića da je postao pripadnik terorističke grupe, čime je počinio krivično djelo Organiziranje terorističke grupe iz člana 202.d stav 2., u vezi sa stavom 1. KZ BiH.

Optužnica je potvrđena dana 11.08.2016. godine.

U optužnici je sadržan i prijedlog za produženje pritvora nakon potvrđivanja optužnice, određen Rješenjem Suda BiH broj: S1 2 K 022112 16 Krn od 24.07.2016. godine, u trajanju od najduže mjesec dana, računajući od dana lišenja slobode, tj. do 23.08.2016. godine.

### **2. Sporazum o priznanju krivice**

Dana 12.08.2016. godine, Sudu je dostavljen sporazum o priznanju krivice zaključen, između optuženog Almira Džinića i njegovog branioca, advokata Mehmeda Ceribašića i tužioca Tužilaštva BiH Ljube Badnjara.

Zaključenim sporazumom optuženi je priznao krivicu za izvršenje krivičnog djela Organiziranje terorističke grupe iz člana 202.d stav 2., u vezi sa stavom 1. KZ BiH, učinjenog na način opisan u dispozitivu predmetne optužnice Tužilaštva BiH, te prihvatio da mu se za počinjenje ovog krivičnog djela izrekne kazna zatvora u trajanju od 1 (jedne) godine. Potpisivanjem sporazuma optuženi je pristao da svjedoči pred Sudom BiH u predmetima saučesnika u izvršenju ovog krivičnog djela.

### **3. Razmatranje sporazuma o priznanju krivice**

Na ročištu održanom dana 16.08.2016. godine, u smislu odredbe člana 231. Zakona o krivičnom postupku BiH, Sud je provjerio i utvrdio da je do zaključenja sporazuma došlo dobrovoljno, svjesno i sa razumijevanjem, da je optuženi upoznat sa mogućim posljedicama zaključenja sporazuma, odnosno da se time odriče prava na suđenje i da ne može uložiti žalbu na krivičnopravnu sankciju.

Optuženi je pred Sudom jasno izjavio da se osjeća krivim za djelo koje mu se optužnicom stavlja na teret, izvršeno na način i u vrijeme opisano u optužnici, te da se za zaključenje sporazuma odlučio svjesno i svojevolarno, u skladu sa čim je i dao izjavu o priznanju

krivice, nedvosmisleno potvrđujući da je upoznat sa svim zakonskim posljedicama zaključenja sporazuma.

Nakon što je razmotrio datu izjavu optuženog, te utvrdio da postoji dovoljno dokaza o krivici optuženog, Sud je zaključio da su u cjelosti ispunjene pretpostavke propisane članom 231. stav 6. ZKP BiH, zbog čega je prihvatio zaključeni sporazum.

#### **4. Dokazni standard**

Standard "dovoljno dokaza", koji zakonodavac propisuje kao uslov za prihvatanje sporazuma o priznanju krivice, Sud je utvrdio na osnovu priznanja optuženog i dokaza navedenih u optužnici<sup>1</sup>, a na koje odbrana nije imala prigovora.

#### **5. Krivična sankcija**

Na pretresu za izricanje krivičnopravne sankcije, tužilac je izjavio da je prilikom predlaganja vrste i visine kazne cijenio prvenstveno činjenicu da se radi o licu koje je kao maloljetnik odvedeno u Siriju, da je optuženi mlađe životne dobi, te da mu treba pružiti novu šansu i mogućnost za deradikalizaciju. Isti je zaključio da je predložena kazna adekvatna težini djela i da će se istom postići svha kažnjavanja.

Advokat Mehmed Ceribašić, branilac optuženog Almira Džinića, složio se sa navodima tužioca, te zatražio od Suda da, s obzirom da je optuženi lošeg imovnog stanja, bude oslobođen naknade troškova krivičnog postupka.

Nakon ocjene svih iznijetih činjenica i okolnosti, Sud je prihvatio sporazumom dogovorenu krivičnu sankciju, te je primjenom odredbi člana 39., 42., 48., 49. i 50. stav 1. tačka b) KZ BiH, za krivično djelo Organiziranje terorističke grupe iz člana 202d. stav 2., u vezi sa stavom 1. KZ BiH, optuženom izrekao kaznu zatvora u trajanju od 1 (jedne) godine.

Odlučujući o vrsti i visini krivične sankcije, Sud je imao u vidu odredbe krivičnog zakonodavstva Bosne i Hercegovine kojima je propisano da će se počinitelj krivičnog djela iz člana 202d. stav 3. KZ BiH kazniti kaznom zatvora u trajanju od najmanje tri godine, te odredbu koja se odnosi na ublažavanje kazne ispod granice propisane zakonom, imajući u vidu pri tome sve okolnosti na strani optuženog, koje su ocijenjene kao osobito olakšavajuće, od kojih posebno činjenicu da je odveden u Siriju kao maloljetnik sa 16 godina, da je svojevolumno napustio ratište i Siriju, da je priznao izvršenja krivičnog djela prije početka glavnog pretresa i izvođenja dokaza, njegovu životnu dob i raniju

---

<sup>1</sup> Zapisnik o ispitivanju osumnjičenog Almira Džinića broj: T20 0 KTT 0011941 16 od 10.08.2016. odine, Tužilaštvo BiH, Zapisnik o saslušanju svjedoka Sedina Huseinovića broj: 16-02/1-3/14 od 05.09.2014. godine, Državne agencije za istrage i zaštitu; Pasoš, broj: A1868354, izdat od MUP-a Ze-De kantona, na ime Almir Džinić, Potvrđqa o izuzimanju putne isprave-pasoš, broj: SL-260/2016. Od 02.08.2016. godine, Ministarstvo pravde BiH, Pritvorska jedinica zavoda za izvršenje krivičnih sankcija; Potvrda o vraćanju-predaji privremeno oduzetih predmeta broj: 15-15-8-112/16 od 25.07.2016. godine, Ministarstvo pravde BiH, Sudska policija; Akt Granične policije BiH o prelasku državne granice za lice Almir Džinić, broj: I-17-10-3-214-2/16 od 05.08.2016. godine, Informacija, Državna agencija za istrage i zaštitu, broj: I-16-04/1-04-1-748-1198/13 od 04.04.2016. godine, Službena zabilješka Državne agencije za istrage i zaštitu, broj: 16-04/1-41/16 od 08.03.2016. godine, sa fotografijama Almira Džinića sa ratišta u Siriji; Izvod iz kaznene evidencije za lice Almir Džinić, Policijska stanica Tešanj, broj: 08-04/12-1-04-2-11-7433/16 od 24.02.2016. godine; Zapisnik o saslušanju svjedoka Samira Čolića, Državna agencija za istrage i zaštite, broj: I-16-04/1-04-1-748-1500/13 od 08.08.2016. godine; Izvještaj o počinjenom krivičnom djelu Državne agencije za istrage i zaštitu, broj: I-16-04/1-04-1-748-1105/13-KU-8/16 od 10.03.2016. godine; Akt Granične policije broj: 17-16-3-04-1021/16 od 03.08.2016. godine

neosuđivanost, te spremnost na saradnju sa Tužilaštvom i Sudom u svim stvarima o kojima isti ima saznanja sa sirijskog ratišta. Na strani optuženog Sud nije našao otežavajuće okolnosti.

Sud je stekao uvjerenje da je optuženi iskazao iskreno kajanje i donio čvrstu odluku da napusti uvjerenja koja su ga odvele na ratište i priključenje terorističkim grupama, zbog čega je zaključio da će se i sa ublaženom kaznom zatvora postići svrha kažnjavanja, u smislu odredbe člana 39. KZ BiH, te da je ista adekvatna učinjenom djelu i stepenu krivične odgovornosti optuženog.

## **6. Pritvor**

Na osnovu člana 56. KZ BiH, optuženom se u izrečenu kaznu ima uračunati vrijeme provedeno u pritvoru po Rješenju Suda BiH broj: S1 2 K 022112 16 Krn od 24.07.2016. godine, i to počev od dana lišenja slobode, tj. od 23.07.2016. godine, a produžen Rješenjem Suda BiH broj: S1 2 K 022112 16 Ko od 16.08.2016. godine, koji pritvor može trajati najduže 9 (devet) mjeseci, odnosno do upućivanja na izdržavanje kazne zatvora ili do nove odluke Suda.

## **7. Troškovi krivičnog postupka**

Rukovodeći se odredbom člana 188. stav 4. ZKP BiH, cijeneći činjenicu da je optuženi bez bilo kakve imovine i sredstava za život, Sud je optuženog Almira Džinića oslobodio dužnosti naknade troškova krivičnog postupka.

**Zapisničar**  
**Stručni saradnik**  
**Amela Huseinbegović**

**SUDIJA**  
**Branko Perić**

**POUKA O PRAVNOM LIJEKU:** Protiv ove presude nije dozvoljena žalba na izrečenu krivičnopravnu sankciju, dok se iz drugih razloga žalba može podnijeti u roku od 15 dana od dana dostavljanja pismenog otpavka presude, Apelacionom odjeljenju ovog suda. Žalba se podnosi u dovoljnom broju primjeraka.